

Morning Dogri (NSD) National News Bulletin 06-02-2025

आकाशवाणी

- दिल्ली विधानसभा दी 70 सीटें लेई कल मतदान होआ, 60.42 फीसदी मतदान दर्ज कीता गेआ।
- केन्द्री गृहमंत्री अमित शाह होरें आखेआ ऐ जे प्रधानमंत्री नरेन्द्र मोदी हुंदी अगुवाई च उत्तर पूर्व तरक्की दी राह पर अग्रसर ऐ।
- जनजाती सांस्कृतिक समागम 2025 अज्ज महाकुंभ प्रयागराज च आयोजित कीता जा'रदा ऐ। 15 ज्हार शा मते जनजाती एह्दे च हिस्सा लेंगन।
- भारत ते इंग्लैंड बश्कार खेड्डे जाने आली त्रै मैचें दी इक रोला अंतर्राष्ट्रीय श्रृंखला दा पैह्ला मैच अज्ज नागपुर च खेड्डेआ जाग।
- केन्द्री मंत्री अश्विनी वैष्णव ते ओपन ए.आई दे मुख् कार्जकारी अधिकारी होरें ए. आई स्टाक बारे सलाह सूत्र कीता।
- विश्व टेबल टेनिस सिंगापुर च भारत दे मानव ठक्कर ते मानुष शाह आली जोड़ी दा अज्ज क्वार्टर फाइनल च फ्रांस दे फ्लोरिन ते एस्तेबान होरें दी जोड़ी कन्नै मकाबला होग।

<><><><><><>

Delhi Voting

दिल्ली विधानसभा दी 70 सीटें आस्तै कल शांतिपूर्ण ढंगै सिर मतदान सम्पन्न होई गेआ। इस दरान लगभग 60.25 फीसद मतदान दर्ज कीता गेआ। सब्बने थमां मता 66.25 फीसद मतदान उत्तर पूर्वी दिल्ली च होआ ते सब्बने थमां घट्ट 56.16 फीसद मतदान दक्खन पूर्व दिल्ली च होआ। शाहदरा जिले च मतदान दा फीसद 63.94 रेआ। उत्तरी दिल्ली च मतदान 59.56 फीसद ते उत्तर-पच्छम दिल्ली च 50.70 मतदान दर्ज कीता गेआ। कल जिनें प्रमुख मेदवारें दी किस्मत ईवीएम च कैद होई गई, उंदे च आम आदमी पार्टी दे अरविंद केजरीवाल, आतिशी, मनीष सिसोदिया ते बीजेपी दे प्रवेश वर्मा, विजेन्द्र गुप्ता, अरविंद्र सिंह लवली ते रमेश बिधूड़ी शामिल न। कांग्रेस दे देवेन्द्र यादव, संदीप दीक्षित ते अल्का लांबा हुंदे नां शामिल न। चुनां मैदान च कुल 699 मेदवार हे। निर्वाचन आयोग नै दिल्ली च आजाद ते निरपक्ख चुनां जकीनी करने आस्तै सुरक्षा दे लोडचदे बंदोबस्त कीते दे हे। पैसा देइयै वोट लैने आलें खलाफ चुनां आयोग नै सख्त रौंह अपनाए दा हा। 7 जनवरी गी दिल्ली चुनां दी घोषणा मगरा थमां कनून नाफिज करोआने आली अजेंसिएं लगभग 236 करोड़ रपे जब्त

कीते। कल पाए गेदे वोटें दी गिनतरी आला कम्म शनिवारें होग। तमिलनाडू दी इरोड ईस्ट ते उत्तर प्रदेश दी मिल्कीपुर विधानसभा सीट लेई बी कल उप-चुनां होआ। इरोड-ईस्ट च लगभग 67.97 फीसद ते मिल्कीपुर च तकरीबन 65.35 फीसद मतदान होआ।

<><><><><><>

Amit Shah

केन्द्री गृहमंत्री अमित शाह होरें जोर दिंदे होई आखेआ ऐ जे पूरा उत्तर पूर्व हुन प्रधानमंत्री नरेन्द्र मोदी हुंदी अगुवाई च तरक्की दी राह् उपपर अग्रसर ऐ। शाह होरें एह गल्ल त्रिपुरा सरकार पाससेआ आयोजित इक कार्यक्रम च 28 सौ नियुक्ति पत्रें दी बंड दरान आक्खी। गृहमंत्री होरें इस मौके पर आखेआ जे त्रिपुरा सरकार पूरी पारदर्शिता कन्नै नौकरियां उपलब्ध करा'रदी ऐ। शाह होरें आखेआ जे पिछले 10एं ब'रें च मोदी सरकार नै त्रिपुरा च शांति आहन्नने आस्तै त्रै समझौते कीते न।

<><><><><><>

Mahakumbh

जनजाती सांस्कृतिक समागम 2025 अज्ज महाकुंभ प्रयागराज च आयोजित कीता गेआ ऐं इस समागम च मुख्य भरै थमां 15 ज्हार कोला मते जनजाती हिस्सा लेंगन। 6 दिनें तगर चलने आले इस समागम च हिस्सा लैने आले जनजातीएं दी संस्कृति ते परंपरा गी बचाने दी सगंध चुक्कगंन। 2025 ब'रे गी आयोजित गौरव वर्ष दे तौरा पर घोषत कीता गेदा ऐ। इस ब'रे बिरसा मुंडा हुंदी 150मीं जयंति मनाई जा करदी ऐ। आकाशवाणी कन्नै गल्ल करदे होई अखिल भारतीय वनवासी कल्याण आश्रम दे आयोजन सचिव अतुल लोग होरें आखेआ जे सारे मुर्तकें शा 8 ज्हार कोला मते जनजातीय युवा युवा कुंभ च हिस्सा लेंगन।

<><><><><><>

News Aga

प्रिंस रहीम अल हुसैनी दुनिया दे इस्माइली मुसलमाने दे 50में वंशानुगत इमाम बनी गे न। उनें गी नमें आगा खान दा नां दित्ता गेआ ऐ। प्रिंस रहीम गी उंदे पिता ते आध्यात्मिक धर्मगुरु करीम आगा खान चतुर्थ हुंदे काल मगरा एह नमां नां थ्होआ ऐ। 53 ब'रे दे प्रिंस रहीम होरें गी उंदे पिता दी बसीयत च आगा पंचम दे तौर पर नामित कीता गेआ हा।

<><><><><><>

PM-Aga Khan

इस्मायली मुसलमाने दे आध्यात्मिक गुरु आगा खान—4 हुंदा 88 बरें दी उम्री च पुर्तगाल च काल होई गेआ। उनेंगी 20 बरे दी उम्री च आध्यात्मिक गुरु घोषित कीता गेआ हा। प्रधानमंत्री नरेंद्र मोदी होरें मुसलमानें दे धर्मगुरु करीम आगा खान 4 हुंदा काल होई जाने पर दुख ते बसोस जाहिर कीता ऐ। सोशल मीडिया पोस्ट च मोदी होरें आखेआ जे प्रिंस करीम आगा खान इक दूरदर्शी व्यक्ति हे ते उनें अपना पूरा जीवन सेवा ते आध्यात्मिक गी समर्पित करी दित्ता। प्रधानमंत्री होरें आखेआ जे सेहत शिक्षा, ग्रामीण विकास ते महिला सशक्तिकरण जनेह खेत्तरें च उंदा योगदान लोके गी म्हेशां प्रेरित करदा रौहग।

<><><><><><>

Cricket

भारत ते इंग्लैंड बश्कार खेड्डे जाने आली त्रै मैचें दी इक श्रृंखला दा पैहला मैच अज्ज दपैहरी नागपुर च पिदर्भ क्रिकेट एसोसिएशन स्टेडियम च चोड्डेआ जाग।

<><><><><><>

I&B-AI

सूचना ते प्रसारण मंत्री अश्विनी वैष्णव होरें कल ओपन ए.आई दे मुख्ख कार्जकारी अधिकारी सैम अल्टमैन हुंदे कन्नै मलाटी कीती। वैष्णव होरें दस्सेआ जे प्रधानमंत्री नरेन्द्र मोदी तकनालोजी दे लोकतंत्रीकरण दे हिमायती न ते अल्टमैन होरें प्रधानमंत्री हुंदे इस नजरियै दी सराहना कीती। मंत्री होरें आखेआ जे उनें ओपन ए.आई स्टैक जीपीओ मॉडल ते ऐप्स तैआर करने दी कार्यनीति पर चर्चा कीती।

<><><><><><>

WTT

विश्व टेबल टेनिस सिंगापुर स्मैश च भारत दी पैहले नंबरा दी मर्दे दी जोड़ी आले खडारी मानव ठक्कर ते मानुष शाह अज्ज क्वार्टर फाइनल च चौथी वरीयता आली फ्रांस दी जोड़ी आले खडारी फ्लोरियन ते एस्तेनान होरें कन्नै मकाबला होग। भारतीय जोड़ी नै हांगकांग दे

वान-चुंग-टिंग ते यी-कवान-टी दी जोड़ी गी कल 3-0 कन्नै हराइयै क्वार्टर फाइनल च अपनी थाहर पक्की कीती ही।

<><><><><><>

Dr, Jaishankar

विदेश मंत्री डॉ. एस.जयशंकर होरें शंघाई सैहयोग संगठन एससीओ दे महासचिव नुरलान यरमे कबायेब हुंदे कन्नै दिल्ली च मलाटी कीती ते उनेंगी उंदी नमीं जिम्मेदारी आस्तै बघाई दित्ती। इक सोशल मीडियो पोस्ट च विदेश मंत्री होरें आखेआ जे उनें एससीओ च भारत दे कम्म ते सुरक्षत एससीओ दे निर्माण पर चर्चा कीती ऐ।

<><><><><><>

CM Budget JK

मुख्यमंत्री ओमर अब्दुल्ला होरें जम्मू-कश्मीर लेई लोकें दे अनुकूल बजट पेश करने दी अपनी सरकार दी वचनबद्धता गी पक्का करदे होई इस गल्लै उप्पर जोर पाया ऐ जे बजट तैयार करने दी प्रक्रिया च लोकें दे नुमाइंदें दी शमूलियत कन्नै लोकें दिएं आसें-तांगें गी जकीनी बनाया जाई सकोग। आकाशवाणी दे जम्मू संवाददाता दी रिपोर्ट मूजब, जम्मू आहले सिविल सैक्रेटेरिएट च बजट शा पैहले आहले सलाह-सुत्तर सरबंधी बैठकें दी प्रधानता करदे होई मुख्यमंत्री होरें आखेआ जे इ'नें बैठकें दा मकसद, बजट तैयार करने शा पैहले प्रमुख सरबंधत धड़ें थमां उंदे सुझाऽ हासल करना ऐ। इस बैठका च अनंतनाग, बडगाम, कटुआ ते सांबा जिलें दे विधायकें ते जिला विकास काउंसल दे अध्यक्षें वीडियो कांफ्रेंस दे राहें हिस्सा लैता। ओमर होरें आखेआ जे विधायकें ते जिला विकास काउंसल दे अध्यक्षें दे विचार ते सुझाऽ, औने आहले बजट गी आकार देने च महत्वै आहली भूमिका निभाउन।

<><><><><><>